

杜工部集

冊六

杜工部集卷第十八目錄

近體詩六十一首

曉發公安

泊岳陽城下

纜船苦風戲題四韻奉簡鄭十三判官

登岳陽樓

陪裴使君登岳陽樓

過南岳入洞庭湖

宿青草湖

宿白沙驛

湘夫人祠

祠南夕望

登白馬潭

歸鴈

野望

入喬口

銅官渚守風

北風

雙楓浦

奉送王信州峯北歸

江閣臥病走筆寄呈崔盧兩侍御

潭州送韋員外牧韶州

潭州留別杜員外院長

韋迢

江閣對雨有懷行營裴二端公

早發湘潭寄杜員外院長

韋迢

酬韋韶州見寄

千秋節有感二首

晚秋長沙蔡侍御飲筵送殷參軍

湖中送敬十使君適廣陵

長沙送李十一

重送劉十弟判官

奉贈盧五丈參謀

登舟將適漢陽

暮秋將歸秦留別湖南幕府親友

送盧侍御護韋尚書靈櫬歸上都二十韻

哭李常侍嶧二首

哭韋大夫之晉

舟中夜雪有懷盧十四侍御弟

對雪

樓上

冬晚送長孫漸舍人歸州

暮冬送蘇四郎傒兵曹適桂州

風疾舟中伏枕書懷三十六韻呈湖南親友

奉贈蕭二十使君

奉送二十三舅錄事之攝郴州

送魏司直崔郎中判官兼寄韋韶州

送趙十七明府之縣

燕子來舟中作

同豆盧峯貽主客李員外賢子棐知字韻

歸鴈二首

小寒食舟中作

清明二首

發潭州

迴棹

贈韋七贊善

奉酬寇十侍御錫見寄四韻復寄寇

杜員外兄垂示詩因作此寄上

郭受

酬郭十五判官

衡州送李大夫七丈勉赴廣州

附錄

他集互見四首

哭長孫侍御

號國夫人

軍中醉飲寄沈八劉叟

杜鵑行

吳若本逸詩七首

聞惠二過東溪特一送

舟泛洞庭

李鹽鐵

長吟

絕句三首

草堂詩箋逸詩拾遺

瞿唐懷古

送司馬入京

惜別行送劉僕射判官

呀鶻行

狂歌行贈四兄

右五篇蘇州太守裴煜如晦所收

逃難

寄高適

送靈州李判官

與嚴二郎奉禮別

巴西驛亭觀江漲呈竇使君二首

遣憂

早花

巴山

收京

巴西聞收宮闕送班司馬入京

花底

柳邊

送竇九歸成都

贈裴南部聞袁判官自來欲有按問

奉使崔都水翁下峽

題鄴縣郭明府茅屋壁

遣悶戲呈路曹長

隨章留後新亭送諸君

東津送韋諷

客舊館

閬州奉送二十四舅

愁坐

陪鄭公秋晚北池臨眺

去蜀

放船

哭台州鄭司戶蘇少監

右二十七篇朝奉大夫員安宇所收

送王侍御往東川

惠義寺送王少尹

右二篇見王原叔本

避地

右一篇見趙次翁本

惠義寺園送辛員外

又送

右二篇見卞園本

杜工部集卷第十八目錄

杜工部集卷第十八

近體詩六十一首

自公安發次岳州及湖南作

曉發公安

數月憩息此縣

北城擊柝復欲罷東方明星亦不遲鄰雞野哭如昨日物色生一云生態能幾時舟楫眇然自此去江湖遠適無前期出門轉眄已陳迹藥餌扶吾隨所之

泊岳陽城下

江國踰千里山城僅百層岸風翻夕浪舟雪灑寒燈留滯才難盡艱危氣益增圖南未可料變化有鯤鵬

纜船苦風戲題四韻奉簡鄭十二判官

泛

楚岸朔風疾天寒鷓鴣呼漲沙霾草樹舞雪渡江湖吹帽時時落維舟日日孤因聲置驛外為覓酒家壚

登岳陽樓

昔聞洞庭水今上岳陽樓吳楚東南坼乾坤日夜浮
親朋無一字老病有孤舟戎馬關山北憑軒涕泗流

陪裴使君登岳陽樓

湖闊兼雲霧樓孤屬晚晴禮加徐孺子詩接謝宣城
雪岸叢梅發春泥百草生敢違漁父問從此更南征
過南岳入洞庭湖

洪波忽爭道岸轉異江湖鄂渚分雲樹衡山引舳艫
翠牙穿裊漿荆作碧節上吐云寒蒲病渴身何去春

生力更無壤童犁雨雪漁屋架泥塗欹側風帆滿微
冥水驛孤悠悠迴赤壁浩浩略蒼梧帝子留遺恨曹
公屈壯圖聖朝光御極殘孽駐艱虞才淑隨廝養名
賢隱鍛鑪邵平元入漢張翰後歸吳莫怪啼痕數危
檣逐夜烏

宿青草湖

洞庭猶在目，青草續爲名。
宿槳依農事，郵籤報水程。
寒冰爭倚薄，雲月遞微明。
湖雁雙雙起，人來故北征。

宿白沙驛

初過湖南五里

水宿仍餘照，人烟復此亭。
驛邊沙舊白，湖外草新青。
萬象皆春氣，孤槎自客星。
隨波無限月，一作景的的近南溟。

湘夫人祠

蕭蕭湘妃廟，空牆碧水春。
蟲書玉佩蘚，燕舞翠帷塵。
晚泊登汀樹，微馨借一作香惜渚蘋。
蒼梧恨不盡，染淚在叢筠。

祠南夕望

百丈牽江色，孤舟泛日斜。
興來猶杖屨，目斷更雲沙。

山鬼迷春竹湘娥倚暮花湖南清絕地萬古一長嗟

登白馬潭

水生春纜沒日出野船開宿鳥行猶去叢花一作花叢笑
不來人人傷白首處處接金盃莫道新知要南征且
未迴

歸雁

聞道今春雁南歸自廣州見花辭漲海避雪到羅浮
是物關兵氣何時免客愁年年霜露隔不過五湖秋

野望

納納乾坤大行行郡國遙雲山兼五嶺風壤帶三苗
野樹侵江闊春蒲長雪消扁舟空老去無補聖明朝

八喬口長沙北界

漠漠舊京遠遲遲歸路賒殘年傍水國落日對春華

樹蜜早蜂亂江泥輕燕斜賈生骨已朽悽惻近長沙

銅官渚守風

不

亦燮作

夜楚帆落避風湘渚間水耕先浸草春火更

燒山早泊雲物晦逆行波浪慳飛來雙白鶴過去杳難攀

北風

新康江口
信宿方行

春生南國瘴氣待北風蘇向晚霾殘日初宵鼓大鑪
爽攜卑溼地聲拔洞庭湖萬里魚龍伏三更鳥獸呼
滌除貪破浪愁絕付摧枯執熱沈沈在凌寒往往須
且知寬疾肺不敢恨危途再宿煩舟子衰容問僕夫
今晨非盛怒便道即長驅隱几看帆席雲山湧坐隅

雙楓浦

輟棹青楓浦雙楓舊已摧自驚衰謝力不道棟梁材

浪足浮紗帽皮須截錦苔江邊地有主暫借上天迴

奉送王信州峯北歸

朝廷防盜賊供給愍誅求下詔選郎署傳聲能典一作

典信州蒼生今日困一作起天子嚮時憂井屋有烟起瘡

痍無血流壤歌唯海甸畫角自山樓白髮寐常早荒

榛農復秋解龜踰臥轍遣騎覓扁舟徐榻不知一作能

倦穎川何以酬塵生一作孝塵彤管筆寒膩黑貂裘高義

終焉在斯文去矣休別離同雨散行止各雲浮林熱

鳥開口江渾魚掉頭尉佗雖北拜太史尚南留軍旅

應都息寰區要盡收九重思諫諍八極念懷柔徙倚

瞻王室從容仰廟謀故人持雅論絕塞豁窮愁復見

陶唐理甘爲汗漫遊

江閣臥病走筆寄呈崔盧兩侍御

客子庖廚薄江樓枕席清衰年病祇瘦長夏想爲情

滑憶

一作喜

彫胡飯香聞錦帶羹溜匙兼煖腹誰欲致

一作覓

盃鬯

潭州送韋員外牧韶州

迢

炎海韶州牧風流漢署郎分符先令望同舍有輝光
白首多年疾秋天昨夜涼洞庭無過雁書疏莫相忘

潭州留別杜員外院長

韋迢

江畔長沙驛

一作澤

相逢纜客船大名詩獨步小郡海

西偏地溼愁飛鵬天炎畏站鳶去留俱失意把臂共

潸然

江閣對雨有懷行營裴二端公

南紀

一作極

風濤壯陰晴屢不分野流行地日江入度

山雲層閣憑雷殷長空水面

一作水面

文雨來銅柱北應

一作意

洗伏波軍

早發湘潭寄杜員外院長

韋 迢

北風昨夜雨江上早來涼
楚岫千峯翠湘潭一葉黃
故人湖外客白首尚爲郎
相憶無南雁何時有報章

酬韋韶州見寄

養拙江湖外朝廷記憶疎
深慚長者轍重得故人書
白髮絲難理並一作新詩錦不如
雖無南去雁看取北來魚

千秋節有感二首

自罷千秋節頻傷八月來
先朝常宴會壯觀已塵埃
鳳紀編生日龍池塹劫灰
湘川新涕淚秦樹遠樓臺
寶鏡羣臣得金吾萬國迴
衢尊不重飲白首獨餘哀
御氣雲樓敞含風綵仗高
仙人張內樂王母獻宮桃

羅襪紅蕖豔金羈白雪毛舞階銜壽酒走索背秋毫
聖主他年貴邊心此日勞桂江流向北滿眼送波濤
晚秋長沙蔡五侍御飲筵送殷六參軍歸澧州

覲省

佳士欣相識慈顏望遠遊甘從投轄飲肯作置書郵
高鳥黃雲暮寒蟬碧樹秋湖南冬不雪吾病得淹留
湖中送敬十使君適廣陵

相見各頭白其如離別何幾年一會面今日復悲歌
少壯樂難得歲寒心匪他氣纏霜匣滿冰置玉壺多
遭亂實漂泊濟時曾琢磨形容吾校老膽力爾誰過
秋晚岳增翠風高湖湧波騫騰訪知己淮海莫蹉跎
長沙送李十一

衡

與子避地西康州洞庭相逢十二秋遠媿尙方曾賜

履竟非吾土倦登樓久存膠漆應難並一辱泥塗遂
晚收李杜齊名真忝竊朔雲寒菊倍離憂

重送劉十弟判官

分源豕韋派別浦雁賓秋年事推兄忝人才覺弟優
經過辨艷劍意氣逐吳鉤垂翅徒衰老先鞭不滯留
本枝凌歲晚高義豁窮愁他日臨江待長沙舊驛樓

奉贈盧五丈參謀琚

時丈人使自江陵在長沙待恩旨先支率錢米

恭惟同自出妙選異高標入幕知孫楚披襟得鄭僑
丈人藉才地門閥冠雲霄老矣逢迎拙相於契託饒
賜錢傾府待爭米駐船遙鄰好艱難薄氓心杼軸焦
客星空伴使寒水不成潮素髮乾垂領銀章破在腰
說詩能累夜醉酒或連朝藻翰惟牽率湖山合動搖
時清非造次興盡却蕭條天子多恩澤蒼生轉寂寥

休傳鹿是馬莫信鵬如陳作鴉未解依依袂還斟泛
泛瓢流年疲蟋蟀體物幸鷦鷯辜刊作負蒼洲願誰
云晚見招

登舟將適漢陽

春宅棄汝去秋帆催客歸庭蔬尚在眼浦浪已吹衣
生理飄蕩拙有心遲暮違中原戎馬盛遠道素書稀
塞雁與時集檣烏終歲飛鹿門自此往永息漢陰機
暮秋將歸秦留別湖南幕府親友

水闊蒼梧野

樊作晚

天高白帝秋途窮那免哭身老不

禁愁大府才能會諸公德業優北歸衝雨雪誰一作俱
憫弊貂裘

送盧十四弟侍御護韋尚書靈櫬歸上都二十

韻

素幕渡江遠朱幡登陸微悲鳴駟馬顧失涕萬人揮
參佐哭辭畢門闌誰送歸從公伏事久之子俊才稀
長路更執紼此心猶倒衣感恩義不小懷舊禮無違
墓待龍驤詔臺迎獬豸威深衷見士則雅論在兵機
戎狄乘妖氣塵沙落禁闈往年朝謁斷他日掃除非
但促一作整銅壺箭休添玉帳旂動詢黃閣老肯慮白
登圍萬姓瘡痍合羣兇一作雄嗜慾肥刺規多諫諍端
拱自光輝儉約前王體風流後代希對敷期特達衰
朽再芳菲空裏愁書字山中疾采薇撥盃要忽罷抱
被宿何依眼冷看征蓋兒扶立釣磯清霜洞庭葉故
就別時飛

哭李常侍嶧一首

一代風流盡修文地下深斯人不重見將老失知音

短日行梅嶺寒山

江一作

落桂林長安若箇畔猶想映

貂金

青瑣陪雙入銅梁阻一辭風塵逢我地江漢哭君時
次第尋書札呼兒檢贈詩發揮王子表不媿史臣詞

哭韋大夫之晉

悽愴郁瑕色差池弱冠年

一作大

人叨禮數文律早

周旋臺閣黃圖裏簪裾紫蓋邊尊榮真不忝端雅獨
條然貢喜音容間馮招病疾纏南過駭倉卒北思悄

聯綿鵬鳥長沙諱犀牛蜀郡憐素車猶慟哭寶劍欲

高懸漢道中興盛韋經亞相傳冲融標世業磊落映

時賢城府深朱夏江湖眇霽天綺樓關

一作高

樹頂飛

旄汎堂前帟幕疑風驚笳簫急暮蟬興殘虛白室跡
斷孝廉船童孺交遊盡喧卑俗事牽老來多涕淚情

在強詩篇誰寄方隅理朝難將帥權春秋褒貶例名
器重雙全

舟中夜雪有懷盧十四侍御一作弟

朔風吹桂水一作大雪夜紛紛暗度南樓月寒深北

渚雲燭斜初近見舟重竟無聞不識山陰道聽雞更

憶君

對雪

北雪犯長沙胡雲冷萬家隨風且間一作開葉帶雨不

成花金錯囊從一作徒罄銀壺酒易賒無人竭浮蟻有

待至昏鴉何遜詩城陰度壘黑昏鴉接翅歸

樓上

天地空搔首頻抽白玉簪皇輿三極北身事五湖南

戀闕勞肝肺論一作掄材媿杞栴亂離難自救終是老

湘潭

冬晚送長孫漸舍人歸州

參卿休坐幄，蕩子不還鄉。
南客瀟湘外，西戎鄠杜旁。
衰年傾蓋晚，費日繫舟長。
會面思來札，銷魂逐去檣。
雲晴鷗更舞，風逆雁無行。
匣裏雌雄劍，吹毛任選將。

暮冬送蘇四郎偕兵曹適桂州

飄飄蘇季子，六印佩何遲。
早作諸侯客，兼工古體詩。
爾賢埋照久，余病長年悲。
盧綰須征日，樓蘭要斬時。
歲陽初盛動，王化久磷緇。
爲入蒼梧廟，看雲哭九疑。

風疾舟中伏枕書懷三十六韻奉呈湖南親友

軒轅休製律，虞舜罷彈琴。
尚錯雄鳴管，猶傷半死心。

聖賢名古邈，羈旅病年侵。
舟泊常依震，湖平早

一作半

見參如聞馬，融笛若倚仲宣襟。
故國悲寒望，羣雲慘

歲陰水鄉霾白屋楓岸疊青岑鬱鬱冬炎瘴濛濛雨

滯淫鼓迎非

非一作方

祭鬼彈落似鴉禽興盡纔無悶愁

來遽不禁生涯相汨沒時物自

正一作

蕭森疑惑尊中

弩淹留冠上簪牽裾驚魏帝投閣爲劉歆狂走終奚

適微才謝所欽吾安藜不糝女

女一作

貴玉爲琛烏几

重重縛鶉衣寸寸針哀傷同庾信述作異陳琳十暑

岷山葛三霜楚戶砧叨陪錦帳座久放白頭吟反樸

時難遇忘機陸易沉應過數粒食得近四知金春草

封歸恨源花費獨尋轉蓬憂悄悄行藥病泔泔瘞天

追潘岳持危覓鄧林蹉跎翻學步感激在知音却假

蘇張舌高誇周宋鐔納流迷浩汗峻址得嶽崙城府

開清旭松筠

篁一作

起碧潯披顏爭倩倩逸足競駸駸

朗鑒存愚直皇天實照臨公孫仍恃險侯景未生擒

書信中原闕干戈北斗深畏人千里井問俗九州箴
戰血流依舊軍聲動至今葛洪尸定解許靖力還任
家事丹砂訣無成涕作霖

奉贈蕭二十使君

昔在嚴公幕俱爲蜀使臣艱危參大府前後間清塵

嚴再領成都
余復參幕府

起草鳴先路乘槎動要津王鳧聊暫出蕭

雉只相馴終始任安義荒蕪孟母鄰聯翩匐禮意

氣死生親

嚴公沒後老母在堂使君溫清之問甘脆之禮名數若
已之庭闈焉太夫人頃逝喪事又首諸孫主典撫孤之

情不減骨肉則膠
漆之契可知矣

張老存家事嵇康有故人食恩慚鹵

莽鏤骨抱酸辛巢許山林志夔龍廊廟珍鵬圖仍矯

翼熊軾且移輪磊落衣冠地蒼茫土木身墳箎鳴自

合金石瑩逾新重憶羅江外同遊錦水濱結歡隨過

隙懷舊益霑巾曠絕含香舍稽留伏枕辰停驂雙闕

早迴雁五湖春不達長卿病從來原憲貧監河受貸
粟一起轍中鱗

奉送二十三舅錄事之攝郴州

崔偉

賢良歸盛族吾舅盡知名徐庶高交友劉牢出外甥
泥塗豈珠玉環堵但柴荆衰老悲人世驅馳厭甲兵
氣春江上別淚血渭陽情舟鷁排風影林鳥反哺聲
永嘉多北至勾漏且南征必見公侯復終聞盜賊平
郴州頗涼冷橘井尚淒清從役何蠻貊居官志在行
送魏二十四司直充嶺南掌選崔郎中判官兼

寄韋韶州

選曹分五嶺使者歷三湘才美膺推薦君行佐紀綱
佳聲斯一作共樊作遠雅節在周防明白山濤鑿嫌

疑陸賈裝故人湖外少春日嶺南長憑報韶州牧新

詩昨寄一作夜將

送趙十七明府之縣

連城爲寶重茂宰得才新
山雉迎舟楫江花報邑人
論文翻恨晚臥病却愁春
惠愛南翁悅餘波及老身

燕子來舟中作

湖南爲客動經春燕子銜泥兩度新
舊入故園常識主如今社日遠看人
可憐處處巢君一作居室何異飄
飄託此身暫語船檣還起去穿花落水
范德機云善本作帖水益
露巾

同豆盧峯知字韻貼主客李員外賢子棐也

鍊金歐冶子噴玉大宛兒
符彩高無敵聰明達所爲
夢蘭他日應折桂早年知爛漫
通經術光芒刷羽儀
謝庭瞻不遠潘省會於斯唱和將
離曲田翁號鹿皮

歸雁二首

萬里衡陽雁今年又北歸雙雙瞻客上一一背人飛
雲裏相呼疾沙邊自宿稀繫書元無一作浪語愁寂故

山薇

欲雪違胡地先花別楚雲却過清渭影高起洞庭羣
塞北春陰暮江南日色曛傷弓流落羽行斷不堪聞

小寒食舟中作

佳辰強飯

飲一云

食猶寒隱几蕭條帶鷓冠春水船如

天上坐老年花似霧中看娟娟戲蝶過閒

開一作

幔片

片輕鷗下急湍雲白山青萬餘里愁看直北是長安

清明二首

朝來新火起新烟湖色春光淨客船繡羽銜花他自
得紅顏騎竹我無緣胡童結束還難有楚女腰肢亦

可憐不見定王城舊處長懷賈傅并依然虛霑焦舉
當作周舉爲寒食實藉嚴君賣卜錢鐘鼎山林各天性濁
醪麤飯任吾年

此身飄泊苦西東右臂偏枯半耳聾寂寂繫舟雙下
淚悠悠伏枕左書空十年蹴踘將雛遠萬里鞦韆習
俗同旅雁上雲歸紫塞家人鑽火用青楓秦城樓閣
烟一作鶯花裏漢主山河錦繡中風水一作春去春來洞庭
闊白蘋愁殺白頭翁

登潭州

夜醉長沙酒曉行湘水春岸花飛送客檣燕語留人
賈傅才未有褚公書絕倫高名前後事迴首一傷神

褚永徽未
放此州

迴棹

宿昔試

世一作

安命自私猶畏天勞生繫一物為客費

多年衡岳江湖大蒸池疫癘偏散才嬰薄

舊一作

俗有

跡負前賢巾拂那關眼瓶罍易滿船火雲滋垢膩凍

雨裊沉

塵一作

綿強飯蓐添滑端居茗續煎清思漢水

上涼憶峴山巔順浪翻堪倚迴帆又省牽吾家碑不

味王氏井依然几杖將衰齒茅茨寄短椽灌園曾取

適遊寺可終焉遂性同漁父成名

一作

異魯連篙師

煩爾送朱夏及寒泉

贈韋七贊善

鄉里衣冠不乏賢杜陵韋曲未央前爾家最近魁三

象

斗魁下兩兩相比為三台

時論同歸

一云因侵

尺五天

俚語云城南韋杜去天尺五

北

走關山

一作河

開雨雪南遊花柳塞雲

一作風

烟洞庭春

色悲公子蝦菜忘歸范蠡船

奉酬寇十侍御錫見寄四韻復寄寇

往別郇瑕地于今四十年來簪御府筆故泊洞庭船
詩憶傷心處春深把臂前南瞻按百越黃帽待君偏
杜員外兄垂示詩因作此寄上

郭受

新詩海內流傳遍舊德朝中屬望勞郡邑地卑饒霧
雨江湖天闊足風濤松醪酒熟旁看醉蓮葉舟輕自
學操春興不知凡幾首衡陽紙價頓能高

酬郭十五判官

才微歲老尚虛名臥病江湖春復生藥裏關心詩總
廢花枝照眼句還成只同燕石能星隕自得隋珠覺
夜明喬口橘洲風浪促繫帆何惜片時程

衡州送李大夫七丈勉赴廣州

斧鉞下青冥樓船過洞庭北風隨爽氣南斗避文星
日月籠中鳥乾坤水上萍王孫丈人行垂老見飄零

附錄

他集互見四首

哭長孫侍御

道為謀一作諫書重名因賦頌雄禮闈曾擢桂憲府

舊一作乘驄流水生涯盡浮雲世事空唯餘舊臺柏

蕭瑟九原中

號國夫人

號國夫人承主恩平明上馬入宮祐集作金門却嫌脂粉

浣顏色淡掃蛾眉朝至尊

軍中醉飲寄沈八劉叟

酒渴愛江清餘甘一作酣漱晚汀軟沙欹坐穩冷石醉

眠醒野膳隨行帳華音發從伶數盃君不見醉一作都

已遣沉冥

杜鵑行見陳浩然本亦見黃鶴本

古時杜宇稱望帝魂作杜鵑何微細跳枝竄葉樹木

中搶佯英華作翔瞥振雌隨雄毛衣慘黑貌一作白憔悴衆

鳥安肯相尊崇隳英華作陋形不敢栖華屋短翮唯願巢

深叢穿皮啄朽觜欲秃苦饑始得食一蟲誰言養雞

不自哺此語亦足為愚蒙聲音咽咽如有謂英華作咽噉若有謂

注云咽平聲號啼略與嬰兒同口乾垂血轉迫促似欲英華

以作欲上訴於蒼穹蜀人聞之皆起立至今敦學傳遺

風英華作相效傳遺風迺知變化不可窮豈知昔日居深宮嬪嬙

一作如左右如花紅

吳若本逸詩七篇

聞惠二過東溪特一送

惠子白駒一作魚坡瘦歸溪惟病身皇天無老眼空谷

滯一作值斯人崖蜜松花熟一作白山杯竹葉新一作村醪

柴門了無一作生事黃一作園綺未稱臣

李邕蕭遠校書云陳恬叔易傳東坡記此詩云右

一篇劉斯立得於管城人家冊子葉中題云工部

員外詩集各甫字東甫其餘諸篇語多不同如故

園桃李今搖落安得愁中却盡生也草堂本右一篇見洪駒父詩話

劉路左車言嘗收得唐人雜篇詩冊有之

舟泛洞庭一作過洞庭湖

蛟室圍青草龍堆擁一作隱白沙護江一作堤盤古木迎

權舞神鷗破浪南風正收颿一作回檣畏日斜雲山千

萬疊底處上仙槎草堂作湖光與天遠直欲泛仙槎

右洪玉甫云有人得之江中石刻王直方云此老杜過洞庭湖詩也潘淳云

元豐中有人得此詩刻于洞庭湖中不載名氏以示山谷山谷曰子美作也今蜀本已收入

李鹽鐵二首後一首題云李監宅在第九卷中

落葉一作華館春風起高城烟霧開雜花分戶映嬌燕入

簷回一見能傾產一作座虛懷只愛才鹽官雖絆驥名

是漢庭來

長吟

江渚翻鷗戲官橋帶柳陰江飛競渡日草見踏春草堂

作心已撥形骸累真為爛熳深賦詩歌草堂作新句穩不

免一作覺自長吟

絕句九首前六首在十二卷中

聞道巴山裏春船正好行都將百年興一望九江城

草堂本云行趙作還城趙作山

水檻温江口茅堂石筍西移船先主廟洗藥浣沙

草堂

花作

設

謾一作

道春來好狂風大放顛吹

飛一作

花隨水去翻

却釣魚船

右謝克家任伯題云右五詩得盛文肅家故書中

猶是吳越錢氏時人所傳格律高妙其為少陵不

疑

詩說雋永晁氏嘗於中壺緘線續夾中得吳越人寫本杜詩諱流字之類乃盛文肅故書也如日出離東水等絕句六首乃九

首其一云漫道春來好二云

草堂詩箋逸詩拾遺

瞿唐懷古

見吳若本又見英華

西南萬壑注勅敵兩崖開地與山根裂江從月窟來

削成當白帝空曲隱陽臺疏鑿功雖美陶鈞力大哉

送司馬入京

見吳若本

羣盜至今日先朝忝從臣
歎君能戀主久客羨歸秦
黃閣長司諫丹墀有故人
向來論社稷爲話涕沾巾

惜別行送劉僕射判官

見陳浩然本
又見英華

聞道南行市駿馬不限疋數軍

一作官

中須襄陽幕府

天下異主將儉省憂艱虞祇收壯健勝鐵甲豈因格

鬪求龍駒而今西北自反胡騏驎蕩盡一疋無龍媒

真種在帝都子孫永落西南隅向非戎事備征伐君

肯辛苦越江湖江湖凡馬多顛顛衣冠往往乘蹇驢

梁公富貴於身疎號令明白人安居俸錢時散士子

盡府庫不爲驕豪虛以茲報主寸心赤氣却西戎迴

北狄羅網羣馬籍

一作鳥籍

馬多氣在

一作用

驅馳出金帛

劉侯奉使光推擇滔滔才略滄溟窄杜陵老翁秋繫

船扶病相識長沙驛強梳白髮提胡盧手把

一作兼

菊

花路旁摘九州兵革浩茫茫三歎聚散臨重陽當杯

對客忍流涕涕一作淚君此字無不覺老夫神內傷

呀鵲行見陳浩然本
又見英華

病鵲孤陳作卑飛俗眼醜每夜江邊宿衰柳清秋落日

英華作月已側身過雁歸鷗錯迴首緊腦雄姿迷所向疎

翻稀毛不可狀強神迷復阜雕前俊才早在蒼鷹上

風濤颯颯寒山陰熊羆欲螫一作繫龍虵深念爾此時

有一擲失聲濺血非其心

狂一作短歌行贈四兄見陳浩然本
又見英華

與兄行年校一歲賢者是兄愚者弟兄將富貴等浮

雲弟切功名好權勢長安秋雨十日泥我曹韞馬聽

晨雞公卿朱門未開鎖我曹已到肩相齊吾兄睡穩

方舒膝不襪不巾踏曉日男啼女哭莫我知身上須

繒腹中實今年思我來嘉州嘉州酒重一作香花繞一作

滿樓樓頭吃酒樓下臥長歌短詠一作歌還相酬四時

八節還拘禮女拜弟妻男拜弟幅巾鞶帶不挂身頭

脂足垢何曾洗吾兄吾兄巢許倫一生喜怒長任真

日斜枕肘寢已熟啾啾啾啾爲何人浩然本作何爲人

右五篇乃蘇州太守裴煜如晦所收見舊集補遺

逃難見陳浩然本

五十頭白翁南北逃世難疏布纏枯骨奔走苦不暖

叶去聲已衰病方入四海一塗炭乾坤萬里內莫見容

身畔妻孥復隨我回首共悲歎故國莽邱墟鄰里各

分散歸路從此迷涕盡湘江岸

寄高適

楚隔乾坤遠難招病客魂詩名惟我共世事與誰論

北闕更新主南星落故園定知相見日爛熳倒芳尊
送靈州李判官

犬戎腥四海回首一茫茫血戰乾坤赤氛迷日月黃
將軍專策略幕府盛材良近賀中興主神兵動朔方
與嚴二郎奉禮別

別君誰暖眼將老病纏身出涕同斜日臨風看去塵
商歌還入夜巴俗自爲鄰尙媿微軀在遙聞盛禮新
山東羣盜散闕下受降頻諸將歸應盡題書報旅人
巴西驛亭觀江漲呈寶使君二首

轉驚波作怒卽恐岸隨流賴有盃中物還同海上鷗
關心小剡縣傍眼見揚州爲接情人飲朝來減半一作
片愁

向晚波微

一作猶

綠連空岸腳青日兼春有暮愁與醉

無醒漂泊猶杯酒躑躅此驛亭相看萬里外同是一
浮萍

遣憂

亂離知又甚消息苦難真受諫無今日臨危憶古人

顧作傷
故臣

紛紛乘白馬攘攘著黃巾隋氏留顧作營宮室

焚燒何太頻

早花

西京安穩未不見一人來臘日一作月巴江曲山花已

自開盈盈當雪杏豔豔待春一作香梅直苦風塵暗誰

憂容一作客鬢催

巴山

巴山遇中使云自峽一作陝城來盜賊還奔突乘輿恐

未回天寒邵伯樹地闊望仙臺狼狽風塵裏羣臣安

在哉

收京

復道收京邑兼聞殺犬戎衣冠却扈從車駕已還宮
尅復成如此安危一作扶持在數公莫令回首地慟哭起
悲風

巴西聞收宮闕送班司馬入京

聞道收宗廟鳴鑾自陝歸傾都看黃屋正殿引朱衣
劍外春天遠巴西勅使稀念君經世亂匹馬向王畿
花底

紫萼扶千藥黃鬚照萬花忽疑行暮雨何事入朝霞
恐是潘安縣堪留衛玠車深知好顏色莫作委泥沙
柳邊

只道梅花發那知柳亦新
枝枝總到地藥藥自開春

紫燕時翻翼黃鸝不露身漢南應老盡霸上遠愁人
送竇九歸成都

文章亦不盡竇子才縱橫非爾更苦節何人符大名
讀書雲閣觀問絹錦官城我有浣花竹題詩須一行
贈裴南部聞袁判官自來欲有按問

塵滿萊蕪甑堂橫單父琴人皆知飲水公輩不偷金
梁獄書因上一作應作秦臺鏡欲臨獨醒時所嫉羣小謗
能深卽出黃沙在何須白髮侵使君傳舊德已見直
繩心

奉使崔都水翁下峽

無數涪江筏鳴橈總發時別離終不久宗族忍相遺
白狗黃牛峽朝雲暮雨祠所過頻問訊到日自題詩
題鄴縣郭三十二明府茅屋壁

江頭且繫船為爾獨相憐雲散灌壇雨春青彭澤田
頻驚適小國一擬問高天別後巴東路逢人問幾賢

遣悶戲呈路十九曹長

江浦雷聲喧昨夜春城雨色動微寒黃鸝並坐交愁
溼白鷺羣飛大劇乾晚節漸於詩律細誰家數去酒
盃寬惟吾最一作君醉愛清狂客百遍相看一作過意未闌

隨章留後新亭會送諸君

新亭有高會行子得良時日動映江幕風鳴排檻旗
絕葦終不改勸酒一作醉欲無詞已隨峴山淚因題零
雨詩

東津送章諷攝閩州錄事

聞說江山好憐君吏隱兼寵行舟遠汎怯別酒頻添
推薦非承乏操持必去嫌他時如按縣不得慢陶潛

客舊館

陳迹隨人事初秋別此亭重來梨葉赤依舊竹林青

風幔何

一作前

時卷寒砧昨夜聲無由出江漢愁緒

一作

渚秋月冥冥

閩州奉送二十四舅使自京赴任青城

聞道王喬烏名因太史傳如何碧雞使把詔紫微天
秦嶺愁回馬涪江醉泛船青城漫污雜吾舅意凄然
愁坐

高齋常見野愁坐更臨門十月山寒重孤城月水昏
葭萌氏種迴左擔犬戎存

一作屯

終日憂奔走歸期未

敢論

陪鄭公秋晚北池臨眺

北池雲水闊華館闢秋風獨鶴元依渚衰荷且映空

采菱寒刺上踏藕野泥中素楸分曹往金盤小徑通
萋萋露草碧片片晚旗紅盃酒霑津吏衣裳與釣翁
異方初豔菊故里亦高桐搖落關山思淹留戰伐功
嚴城殊未掩清宴已知終何補參卿事一作參歡娛
到薄躬

去蜀

五載客蜀郡一年居梓州如何關塞阻轉作瀟湘遊
世一作萬事已黃髮殘生隨白鷗安危大臣在不一作何
必淚長流

放船

收帆下急水卷幔逐回灘江市戎戎暗山雲淦淦寒
村荒一作荒林無徑入獨鳥怪人看已泊城樓底何曾夜
色闌

哭台州鄭司戶蘇少監

故舊誰憐我平生鄭與蘇存亡不重見喪亂獨前途

豪俊何人

一作誰人

在文章掃地無羈遊萬里關凶問一

年俱白首中原上清秋大海隅夜臺當北斗泉路著

東吳得罪台州去時危棄碩儒移官蓬閣後穀貴沒

潛夫流慟嗟何及銜冤有是夫道消詩興廢心息酒

爲徒許與才雖薄追隨跡未拘班揚名甚盛嵇阮逸

相須會取君臣合寧銓品命殊賢良不必展廊廟偶

然趨勝決風塵際功安造化鑪從容拘

一作詢

舊學慘

淡悶陰符擺落嫌疑久哀傷志力輸俗依綿谷異客

對雪山孤童稚思諸子交朋列友于情乖清酒送望

絕撫墳呼瘡病

一作痢

餐巴水瘡痍老蜀都飄零迷哭

處天地日榛蕪

右二十七篇朝奉大夫員安宇所收

送王侍御往東川放生池祖席

東川詩友合此贈怯輕爲况復傳宗近空然惜別離
梅花交近野草色向平池儻憶江邊臥歸期願早知

惠義寺送王少尹赴成都

得峯字

苒苒谷中寺娟娟林表峯闌干上處遠結構坐來重
騎馬行春徑衣冠起晚鐘雲門青寂寂此別惜相從

右二篇見王原叔本

避地

避地歲時晚竄身筋骨勞詩書遂牆壁奴僕且旌旄
行在僅聞信此生隨所遭神堯舊天下會見出腥臊

右一篇見趙次翁本題云至德二載丁酉作

惠義寺園送辛員外

朱櫻此日垂朱實郭外誰家負郭田萬里相逢貪握手高才仰望足離筵

又送

雙峯寂寂對春臺萬竹青青照送一作客杯細草留連侵坐軟殘花悵望近人開同舟昨日何由得並馬今朝未擬迴直到綿州始分首江邊樹裏共誰來

右二篇見卞園本

並見吳若本

杜工部集卷第十八

孫上階

古二論

得未謝

謝坐

更事

及

手高

米

杜工部集卷第十九目錄

表賦記說讚述十五首

進三大禮賦表

朝獻太清宮賦

朝享太廟賦

有事于南郊賦

進封西嶽賦表

封西嶽賦

進鵬賦表

鵬賦

天狗賦

唐興縣客館記

說旱

畫馬贊

雜述雜客論

秋述賦

東西兩川說

卷之

桂西

杜工部集卷第十九目錄

官事

臨事

薄德

與三大

表

杜工部集卷第十九目錄

杜工部集卷第十九

表賦記說讚述十五首

進三大禮賦表

天寶十三年

臣甫言臣生長陛下淳樸之俗行四十載矣與麋鹿

同羣而處浪跡

吳本有於字

陛下豐車長林實自弱冠之

年矣豈九州牧伯不歲貢豪俊於外豈陛下明詔不
及席思賢於中哉臣之愚頑靜無所取以此知分沈
埋盛時不敢依違不敢激訐默以漁樵之樂自遣而

已頃者賣藥都市寄食朋友

吳作友朋

竊慕堯翁擊壤之

謳適遇國家郊廟之禮不覺手足蹈舞形於篇章激

吮甘液游泳和氣聲韻寢廣卷軸斯存抑亦古詩之
流希乎述者之意然詞理野質終不足以拂天聽之
崇高配史籍以永久恐修先狗馬遺恨九原謹稽首

投延恩甄獻納上表進明主朝獻太清宮朝享太廟
有事于南郊等三賦以聞臣甫誠惶誠恐頓首頓首
謹言

朝獻太清宮賦

冬十有一月天子既納處士之議承漢繼周革弊用
古勒崇揚休明年孟陬將據大禮以相籍越彝倫而
莫儔歷良辰而戒吉分祀事而孔修營室主夫宗廟
乘輿備乎冕裘甲子王以昧爽春寒薄而清浮虛闐
闐逗蚩尤張猛馬出騰虬捎熒惑墮旄頭風伯扶道
雷公挾輶通天台之雙闕警溟漲之十洲浩劫礪礪
萬山颼颼斂臻于長樂之舍蒐入乎崑崙之邱太一
奉引庖犧左文粹右堯步舜趨禹馳湯驟鬱閔宮之
律萃圻元氣以經構斷紫雲而竦牆撫流沙而承霽

紛隳珠而陷碧燿波錦而浪繡森青冥而欲雨艷光
炯而初晝於是翠蕤俄的藻藉舒就祝融擲火以焚
香溪女捧盤而盥漱羣有司之望幸辨名物之難究
瓊漿自間於粢盛羽客先來於介冑爍聖祖之儲祉
敬雲孫而及此詔軒轅使合符敕王喬以視履積昭
感于嗣續匪正辭於祝史若盼鑿而有憑肅風飈而
乍起揚流蘇於浮柱金英霏而披靡擬雜珮於曾巔
孔文粹
作芝蓋敬以颯纒中縱縱以迴復外蕭蕭而未已
上穆然注道爲身覺天傾耳陳僭號于五代復戰國
於千祀曰嗚呼昔蒼生纏孟德之禍爲仲達所愚鑿
齒其俗窳窳其孤赤烏高飛不肯止其屋黃龍哮吼
不肯負其圖伊神器臬兀而小人响喻歷紀大破瘡
痍未蘇尙攫拏於吳蜀又顛躓於羯胡縱羣雄之發

憤

一作讀

誰一統于亨衢在拓跋與宇文豈風塵之不

殊

雜一作

比聰魔及堅特渾獬豹而齊驅愁陰鬼嘯落

日梟呼各擁兵甲俱稱國都且耕且戰何有何無惟

累聖之徽典恭淑慎以允緝茲火土之相生非符讖

之備及煬帝終暴叔寶初襲編簡尚新義旗爰入既

清國難方覩家給竊以為數子自誣敢正乎五行攸

執而觀者潛晤

一作悟

或喜至於泣鱗介以之鳴簾昆

蚊以之振蟄

一作知鱗介之鳴
簾昆蚊以振蟄

感而遂通罔不具集乞

神光而紺閻羅詭異以戢香地軸傾而融曳洞宮儼

以疑岌九天之雲下垂四海之水皆立鳳鳥威遲而

不去鯨魚屈矯以相吸掃太始之含靈卷殊形而可

挹則有虹蜺為鉤帶者入自於東揭莽蒼履崆峒素

髮漠漠至精濃濃條弛張於巨細覲披寫於心胸蓋

修竿無隙而仄席已容裂手中之黑簿晚堂下之金

鐘得非擬斯人于壽域明返樸於元蹤忽翳日而翻

萬象却浮雲

文粹作空

而留六龍咸讐跡而壯茲應終蒼

黃而昧所從上猶色若不足處之彌恭天師張道陵

等洎左元君者前千二百官吏謁而進曰今王巨唐

帝之苗裔坤之紀綱土配君服宮尊臣商起數

一作數起

得統特立中央且大樂在懸黃鐘冠八音之首太昊

斯啓青陸獻千春之祥曠哉勤力耳目宜乎大帶斧

裳故風后孔甲充其佐山稽岐伯翼其旁至於易制

取法足以朝登五帝夕宿三皇信周武之多幸存漢

祖之自強且近朝之濫吹仍改卜乎祠堂初降素車

終勤恤其後有客白馬固漂淪不忘伊庶人得議實

邦家之光臣道陵等試本之於青簡探之於縹囊列

聖有差夫子聞斯於老氏好問自久宰我同科於季
康取撥亂返正乃此其所長萬神開八駿迴旗掩月
車奮雷騫七曜燭九垓能事穎脫清光大來或曰今
太平之人莫不優游以自得况是蹴魏踏晉批周抉
隋之後與夫乎一作更始者哉

朝享太廟賦

初高祖太宗之櫛風沐雨勞身焦思用黃鉞白旗粹文
施作者五年而天下始一歷三朝而戮力今庶績之大
備上方采厖俗之謠稽正統之類蓋王者盛事臣聞
之於里曰昔武德已前黔黎蕭條無復生意遭鯨鯢
之蕩汨荒歲月而沸渭袞服紛紛朝廷多閏者仍巨
乎晉魏臣竊以自赤精之衰歇曠千載而無真人及
黃圖之經綸息五行而歸厚地則知至數不可以久

缺凡材不可以長寄故高下相形而尊卑各一作異

惟神斷繫之於是本先帝取之以義壬辰既格于道

祖乘輿卽以是日致齋于九室所以昭達孝之誠所

以明繼天之質具禮有素六官咸秩大輅每出或黎

元不知豐年則多而筐筥甚實既而太尉參乘司僕

扈蹕望重闈以肅恭順法駕之徐疾公卿溘古士卒

精一黜宗廟之愈深抵職司之所密宿翠華於外戶

曙黃屋於通術氣淒淒於前旒光靡靡於嘉栗階有

賓乍帳有甲乙升降之際見玉柱生芝擊拊之初覺

鈞天合律筍簾佗以碣磻干戚宛而婆娑鞀鼓填箎

爲之主鐘磬竽瑟以之和雲門咸池取之至空桑孤

竹貴之多八音脩一作循通既比乎旭日昇而氛埃滅

萬舞陵亂又似乎春風壯而江海波鳥不敢飛而元

甲嶠嶮以岳峙象不敢去而鳴珮剡爚以星羅已而
上乾豆以登歌美休成之既饗璧玉儲精以稠疊門
闌洞豁而森爽黑帝歸寒而激昂蒼靈戒曉而來往
熙事莽而克塞羣心麇以振蕩桐花未吐孫枝之鸞
鳳相鮮雲氣何多宮井之蛟龍亂上若夫生宏佐命
之道死配貴神之列則殷劉房魏之勳是可以中摩
伊呂上冠夔禹代天之工爲人之傑丹青滿地松竹
高節自唐興以來若此時哲皆朝有數四名垂卓絕
向不遇反正撥亂之主君臣父子之別奕葉文武之
雄注意生靈之切雖前輩之溫良寬大豪俊果決曾
何以措其筋力與韜鈴載其刀筆與喉舌使祭則與
食則血若斯之盛而已爾乃直于主索于祊警幽全
之物散純道之精蓋我后常用維時克貞營以蕭合

酌以茅明嘏以慈告祝以孝成故天意張皇不敢殄
其瑞神姦妥帖不敢秘其精而撫無一作絕軌享鴻名

者矣于以奏永安于以奏王夏福穰穰於絳闕芳霏

霏於玉斝沛枯骨而破聾盲施殀胎而逮鰥寡園陵

動色躍在藻之泉魚弓劍皆鳴汗鑄金之風馬霜露

堪吸正祥可把曾宮獻歆陰事儼雅薄清輝於鼎湖

之山上一作靜餘響於蒼梧之野下一作上無一本窅然漠

漠惕然競競紛益所慕若不自勝瞰牙旗而獨立吟

翠駮而未乘五老侍祠而精駭千官逖聽而一作思

凝於是二丞相進曰陛下應道而作惟天與能澆訛

散淳樸登尚猶日慎業業孝思烝烝恐一物之失所

懼先王之咎徵如此之勤恤匪懈是百姓何以報夫

元首在臣等何以克其股肱且如周宣之教親不暇

孝武之淫祀相仍諸侯敢于迫脅方士奮其威稜一則以微言勸內一則以輕舉虛憑又非陛下恢廓緒業其瑣細亦曷足稱丞相退上謁天躋地授綏登車伊鴻文粹作頡洞槍壘先出爲儲胥本枝根株乎萬代睿想經緯乎六虛甲午方有事於采壇紺席宿夫行所如初

有事于南郊賦

蓋主上兆於南郊聿懷多福者舊矣今茲練時日就陽位之美又所以厚祖考通神明而已職在宗伯首崇禋祀先是春官條文粹作修頌祇之書獻祭天之紀令泰龜而不昧俟萬事之將履掌次閱氈邸之則封人考壝宮之旨司門轉致乎牲牢之繫小胥專達乎懸位之使二之日朝廟之禮既畢天子蒼然視於無形

澹然若有所聽又齋心於宿設將盱食而匪寧旌門
坡陁以前驚殼騎反覆以相經頓曾城之軋軋萬
戶之熒熒馳道端而如砥浴日上而如萍掣翠旄於
華蓋之角彗黃屋於鉤陳之星神仙戍削以落羽翹
翹幽憂以固局戰岐慄華擺渭掉涇地回回而風淅
淅天泱泱而氣青青甲冑乘陵轉迅雷於荆門巫峽
玉帛清迴霽夕雨於瀟湘洞庭於是乘輿霈然乃作
翳夫鸞鳳將至以冲融寥廓不可以彌度聲明通乎
純粹溟滓爲之垠堦駟蒼螭而蜿蜒若無骨以柔順
奔鳥攫而黝黝徒有勢於殺縛朱輪竟野而杳冥金
鏤一作駭成陰以結絡吹堪輿以軒輕一作轉槍寒暑以
前却中營密擁乎太陽宸眷眇臨乎長薄熊羆弭耳
以相舐虎豹高跳以虛攫上方將降帷宮之緜縞屏

玉軼

軼一作軼

以蠓略人門行馬以拱乎合沓之場皮弁

大裘始進於穹崇之幕衝牙鏗鏘以將集周衛轆轤

而咸若月窟黑而扶桑寒田燭稠而曉星落肅定位

以告潔

挈一作挈

藹巖上而清超雲齒蒼以張蓋春葳蕤

以建杓簪裾斐斐樽俎蕭蕭方面曲折周旋寂寥必

本於天王宮與夜明相射動而之地山林與川谷俱

標於是乎官有御事有職所以敬鬼神所以勤稼穡

所以報本反始所以度長立極元酒明水之上越席

疏布之側

列一作列

必取先於稻秫麴蘖之勤必取著於

紛純文繡之飾雖三牲八簋豐備以相公而蒼璧黃

琮實歸乎正色先王之丕業繼起信可以永其昭配

羣望之徧祭在斯示有以明其翼戴由是播其聲音

以陳列從乎節奏以進退韶夏漢武采之於訓謨鍾

原书缺页

原书缺页

僭粲然優劣宜其課密於空積忽微刊定於興廢繼
絕而後觀數統從首八音六律而惟新日起算外一
字千金而不滅上曰吁昊天有成命帝一作惟五聖以
受我其夙夜匪遑實用素樸以守于嗟乎麟鳳胡爲
乎郊藪豈上帝之降鑒及茲元元之垂裕于後夫聖
以百年爲鶉鷲道以萬物爲芻狗今何以茫茫臨乎
八極眇眇託乎羣后端策拂龜於周漢之餘緩步闕
視於魏晉之首斯上古成法蓋其人已朽不足道也
於是天子默然而徐思終將固之又固之意不在抑
殊方之貢亦不必廣無用之祠金馬碧雞非理人之
術珊瑚翡翠此一物何疑奉郊廟以爲寶增怵惕以
孜孜况大庭氏之時六龍飛御之歸

進封西嶽賦表

主手四十四

臣甫言臣本杜陵諸生年過四十經術淺陋進無補於明時退常困於衣食蓋長安一匹夫耳頃歲國家有事於郊廟幸得奏賦待制於集賢委學官試文章再降恩澤乃猥以臣名實相副送隸有司參列選序然臣之本分甘棄置永休望不及此豈意頭白之後竟以短篇隻字遂曾聞徹宸極一動人主是臣無負於少小多病貧窮好學者已在臣光榮雖死萬足至於仕進非敢望也日夜憂迫伏未知何以上答聖慈明臣子之効况臣常有肺氣之疾恐忽復先草露塗糞土而所懷冥寞孤負皇恩敢據竭憤懣領略不則作封西嶽賦一首以勸所覲明主覽而留意焉先是御製嶽碑文之卒章曰待余安人治國然後徐思其事此蓋陛下之至謙也今茲人安是已今茲國富是

已况符瑞翕集福應交至何翠華之脈脈乎維嶽固
陛下本命以永嗣業維嶽授陛下元弼克生司空斯
又不可寢已伏惟天子霈然留意焉春將披圖視典
冬乃展采錯事口尚浩闊人匪勞止庶可試哉微臣
不任區區懇到之極謹詣延恩匭獻納奉表進賦以
聞臣甫誠惶誠恐頓首頓首謹言

封西嶽賦

并序

上既封泰山之後三十年間車轍馬跡至于太原還
于長安時或謁太廟祭南郊每歲孟冬巡幸溫泉而
已聖主以爲王者之體告厥成功止于岱宗可矣故
不肯到崆峒訪具茨驅八駿於崑崙親射蛟於江水
始爲天子之能事壯觀焉爾况行在供給蕭然煩費
或至作歌有慚於從官誅求坐殺於長吏甚非主上

執元祖醇濃之道端拱御蒼生之意大哉聖哲垂萬
代則蓋上古之君皆用此也然臣甫愚竊以古者疆
場有常處贊見有常儀則備乎玉帛而財不匱乏矣
動乎車輿而人不愁痛矣雖東岱五嶽之長足以勒
崇垂鴻與山石無極伊太華最爲難上至於封禪之
事獨軒轅氏得之夫七十二君罕能兼之矣其餘或
蹶踣風雲碑版祠廟終么麼不足追數今聖主功格
軒轅氏業纂七十君風雨所及日月所照莫不砥礪
華近甸也其可慝乎比歲鴻生巨儒之徒誦古史引
時呂作詩義云國家土德與黃帝合主上本命與金天
合而守闕者亦百數天子寢不報蓋謙如也頃或詔
厥郡國掃除曾巔雖翠蓋可薄乎蒼穹而銀字未藏
於金氣臣甫誠薄劣不勝區區吟詠之極故作封西

嶽賦以勸賦之義預述上將展禮焚柴者實覲聖意
因有感動焉爲其詞曰
惟時孟冬百工乃休上將陟西嶽覽八荒御白帝之
都見金天之王旣刊石乎岱宗又合符乎軒皇茲事
體大越不可載已先是禮官草具其儀各有典司俯
叶吉日欽若神祇而千乘萬騎已蟻略倂擬屈矯陸
離唯君所之然後拭翠鳳之駕開日月之旗撞鴻鐘
發雷輜辨格澤之脩竿決河漢之淋漓曠天狼之威
弧墜翹翹之霏霏赤松前驅彭祖後馳方明夾轂昌
寓侍衣山靈秉鉞而踉蹌海若護蹕而參差風馭冉
以縱螭雲螭縈而遲轔地軸軋軋殷以下折原隰草
木儼而東飛岐梁閃倏涇渭反覆而天府載萬侯之
玉尚方具左燾黃屋已焜煌於山足矣乘輿尚鳴鑾

輿儲精澹慮華蓋之大角低回北斗之七星皆去屈
蒼山而信宿屯絕壁之清曙旣臻夫陰宮犀象碑兀
戈鋌悉宰飄飄蕭蕭洵洵如也於是太一抱式元冥
司直天子迺宿被齋就登陟駢素虬超崩峯天語祕
而不可知代欲聞而不可得柴燎上達神光充塞泥
金乎齒蒼之南刻石乎青冥之北上意由是茫然延
降天老與之相識問太微之所居稽上帝之遺則颯
弭節以徘徊撫八絃而賦黑忽風翻而景倒澹殊狀
而異色回若褰祛開帷下辯宸極者久之雲氣蒼以
迴複山嘑業而未息祀事孔明有嚴有翼神保是格
時萬時億爾乃駐飛龍之秋秋詔王屬以中休覲羣
后於高掌之下張大樂於洪河之州芬樹羽林莽不
可收千人舞萬人謳麒麟跋跋而在郊鳳凰蔚跂而

來遊雷公伐鼓而揮汗地祇被震而悲愁樂師拊石
而具發激越乎遐陬羣山爲之相峽萬穴爲之倒流
又不可得載已久而景移樂闋上悠然垂思曰嗟乎
余昔歲封泰山禪梁父以爲王者成功已纂終古嘗
覽前史至於周穆漢武豫遊寥闊亦所不取惟此西
嶽作鎮三輔非無意乎頃者猶恐百姓不足人所疾
苦未暇瘞斯玉帛考乃鐘鼓是以視嶽於諸侯錫神
以茅土豈唯壯設險於甸服報西成之農扈亦所以
感一念之精靈答應時之風雨者矣今茲冢宰庶尹
醇儒碩生僉曰黃帝顓頊乘龍遊乎四海發軔匝乎
六合竹帛有云得非古之聖君而泰華最爲難上故
封禪之事鬱沒罕聞以余在位發祥隕祉者焉可勝
紀而不得已遂建翠華之旗用塞雲臺之議矧乎殊

方奔走萬國皆至元元從助清廟獻歆也臣甫舞手
蹈足曰大哉爍乎真天子之表奉天爲子者已不然
何數千萬載獨繼軒轅氏之美彼七十二君又疇能
臻此蓋知明主聖罔不克正功罔不克成放百靈歸
華清

進鵬賦表

天寶二載

臣甫言臣之近代陵夷公侯之貴磨滅鼎銘之勳不
復照耀於明時自先君恕預以降奉儒守官未墜素
業矣亡祖故尚書膳部員外郎先臣審言修文於中
宗之朝高視於藏書之府故天下學士到于今而師
之臣幸賴先臣緒業自七歲所綴詩筆向四十載矣
約千有餘篇今賈馬之徒得排金門上玉堂者甚衆
矣唯臣衣不蓋體常寄食於人奔走不暇只恐轉死

溝壑安敢望仕進乎伏惟天子文粹作明主哀憐之明主

此二字無

儻使執先祖之故事拔泥塗之久辱則臣之

述作雖不足以鼓吹六經先鳴數子至於沈鬱頓挫
隨時敏捷而揚雄枚皋之流庶可跂及也有臣如此
陛下其舍諸伏惟明主哀憐之無令役役便至於衰
老也臣甫誠惶誠恐頓首頓首死罪死罪臣以爲鵬
者鷲鳥之殊特搏擊而不可當豈但壯觀於旌門發
狂於原隰引以爲類是大臣正色立朝之義也臣竊
重其有英雄之姿故作此賦實望以此達於聖聰矣
不揆蕪淺謹投延恩匭進表獻賦以聞謹言

鵬賦

當九秋之淒清見一鶚之直上以雄材爲己任橫殺
氣而獨往梢梢勁翮肅肅遺響杳不可追俊無留賞

彼何鄉之性命碎今日之指掌伊鷺鳥之累百敢同年而爭長此鷗之大略也若乃虞人之所得也必以氣稟元冥陰乘甲子河海蕩瀟風雲亂起雪沍山陰冰纏樹死迷向背於八極絕飛走於萬里朝無以充腸夕違其所止頗愁呼而蹭蹬信求食而依倚用此時而椽杙待尤者而綱紀表狎羽而潛窺順雄姿之所擬剡捷來於森木固先繫於利觜解騰攫而竦神開網羅而有喜獻令文粹作禽之課數備而已及乎閩隸受之也則擇其清質列在周垣揮拘攣之掣曳挫豪梗之飛翻識畋遊之所使登馬上而孤騫然後綴以珠飾呈於至尊搏風槍壘用壯旌門乘輿或幸別館獵平原寒蕪空闊霜仗喧繁觀其夾翠華而上下卷毛血之崩奔隨意氣而電落引塵沙而晝昏豁堵牆

之榮觀棄功效而不論斯亦足重也至如千年孽狐
三窟狡兔恃古塚之荆棘飽荒城之霜露迴惑我往
來趲起我場圃雖有青駸戴角白鼻如匏蹙奔蹄而
俯臨飛迅翼而遐寓而料全於果見迫寧遽屢攬之
而穎脫便有若於神助是以嘒哮其音颯爽其慮續
下韞而繚繞尙沒跡而容與奮威逐北施巧無據方
蹉跎而就擒亦造次而難去一奇卒獲百勝昭著夙
昔多端蕭條何處斯又足稱也爾其鷓鴣鴉鷂之倫
莫益於物空生此身聯拳拾穗長大如人肉多奚有
味乃不珍輕鷹隼而自若託鴻鵠而爲鄰彼壯夫之
慷慨假強敵而逡巡拉先鳴之異者及將起而復粹文
盡作臻忽隔天路終辭水濱寧掩羣而盡取且快意而
驚新此又一時之俊也夫其降精於金立骨如鐵目

通於腦筋入於節架軒楹之上純漆光芒掣梁棟之間寒風凜冽雖趾躄千變林嶺萬穴擊叢薄之不開突杙枿而皆折又有觸邪之義也久而服勤是可吁畏必使烏攫之黨罷鈔盜而潛飛梟怪之羣想英靈而虛墜豈非虛陳其力叨竊其位等摩天而自安與槍榆而無事者矣故不見其用也則晨飛絕壑暮起長汀來雖自負去若無形置巢截窠養子青冥倏爾年歲茫然闕廷莫試鈎爪空迴斗星衆鷄儻割鮮於金殿此鳥已將老於巖扃

天狗賦

并序

天寶中上冬幸華清宮甫因至獸坊怪天狗院列在諸獸院之上胡人云此其獸猛健一作捷無與比者甫壯而賦之尚恨其與凡獸相近

澹華清之莘莘漠漠而山殿戍削縹與天風崛乎迴
薄上揚雲旂兮下列猛獸夫何天狗嶙峋兮氣獨神
秀色似狻猊小如猿狖忽不樂雖萬夫不敢前兮非
胡人焉能知其去就向若鐵柱欹而金鑱斷兮事未
可救瞥流沙而歸月窟兮斯豈踰晝日食君之鮮肥
兮性剛簡而清瘦敏於一擲威解兩鬪終無自私必
不虛透嘗觀乎副君暇豫奉命于畋則蚩尤之倫已
脚渭戟涇提挈邱陵與南山周旋而慢圍者戮實禽
有所穿伊鷹隼之不制兮呵犬豹以相纏蹙乾坤之
翕習兮望麋鹿而飄然由是天狗捷來發自於左頓
六軍之蒼黃兮劈萬馬以超過材官未及唱野虞未
及和回駢矢與流星兮圍要害而俱破洎千蹄之迸
集兮始拘怒以相賀真雄姿之自異兮已歷塊而高

臥不愛力以許人兮能絕甘以爲大既而羣有噉咋
勢爭割據垂小亡而大傷兮翻投跡以來預劃雷殷
而有聲兮紛膽破而何遽似爪牙之便秃兮無魂魄
以自助各弭耳低徊閉目而去每歲天子騎白日御
東山百獸蹶蹙以皆從兮四猛乞銛銳乎其間夫靈
物固不合多兮胡役役隨此輩而往還惟昔西域之
遠致兮聖人爲之豁迎風虛露寒體蒼螭軋金盤初
一顧而雄材稱是兮召羣公與之俱觀宜其立聞闔
而吼紫微兮却妖孽而不得上千時駐君之玉輦兮
近奉君之渥歡使臭處而誰何兮備周垣而辛酸彼
用事之意然兮匪至尊之賞闡仰千門之峻嶒兮覺
行路之艱難懼精爽之衰落兮驚歲月之忽殫顧同
儕之甚少兮混非類以摧殘偶快意於校獵兮尤見

疑於躡捷此乃獨步受之於天兮孰知羣材之所不
接且置身之暴露兮遭縱觀之稠疊俗眼空多生涯
未愜吾君儻憶耳尖之有長毛兮寧久被斯人終日
馴狎已

唐興縣客館記

中興之四年王潛爲唐興宰修厥政事始自鰥寡惇
獨而和其封內非侮循循不畏險膚而行而一咨千
官屬于羣吏于衆庶曰邑中之政庶幾繕完矣惟賓
館上漏下溼吾人猶不堪其居以容四方賓賓其謂
我何改之重勞我其謂人何咸曰誕事至濟厥載則
達觀于大壯作之閉閤作之堂構以永圖崇高廣大
踰越傳舍通梁直走菟將墜壓素柱上承安若泰山
兩傍序開發洩霜露潛靚深矣步欄複霽萬瓦在後

匪丹雘爲實疎達爲迴廊南注又爲覆廊以容介行人亦如正館制度小劣直左階而東封殖修竹茂樹挾右階于南環廊又注亦可以行步風雨不易謀而集事邑無妨工亦無匱財人不待子來定不待方中矣宿息井樹或相爲賓或與之毛天子之使至則曰邑有人焉某無以粟階州長之使至則曰某非敢賓也子無所用俎四方之使至則曰子貺某多矣敢辭贄或曰明府君之侈也何以爲人皆曰我公之爲人也何以侈子徒見賓館之近夫厚不知其私室之甚薄器物未備力取諸私室人民不知賦斂乃至於館之醢醢闕出於私廚使之乘駟闕辦於私廡君豈爲亭長乎是躬親也若館宇不修而觀臺榭是好賓至無所納其車我浩蕩無所措手足獲高枕乎其誰不

病吾人矣玼瑕忽生何以爲之是道也施舍不幾乎
先覺矣杖之友朋歎曰美哉是館也成人不知人不
怒廨署之福也府君之德也府君曰古有之也非吾
有也余何能爲是亦前州府君崔公之命也余何能
爲是自辛丑歲秋分大餘二小餘二千一百八十八
杜氏之老記已

說旱

初中丞嚴公節制
劍南日奉此說

周禮司巫若國大旱則率巫而舞雩傳曰龍見而雩
謂建巳之月蒼龍宿之體昏見東方萬物待雨盛大
故祭天遠爲百穀祈膏雨也今蜀自十月不雨月旅
建卯非雩之時奈久旱何得非獄吏只知禁繫不知
疎決怨氣積冤氣盛亦能致旱是何川澤之乾也塵
霧之塞也行路皆菜色也田家其愁痛也自中丞下

車之初軍郡之至罷弊之俗已下手開濟矣百事冗
長者又以革削矣獨獄囚未聞處分豈次第未到爲
獄無濫繫者乎穀者百姓之本百役是出况冬麥黃
枯春種不入公誠能暫輟諸務親問囚徒除合死者
之外下筆盡放使囹圄一空必甘雨大降但怨氣消
則和氣應矣躬自疏決請以兩縣及府繫爲始管內
東西兩川各遣一使兼委刺史縣令對巡使同疏決
如兩縣及府等囚例處分衆人之望也隨時之義也
昔貞觀中歲大旱文皇帝親臨長安萬年二赤縣決
獄膏雨滂足卽岳鎮方面歲荒札皆連帥大臣之務
也不可忽凡今徵求無名數又耆老合侍者兩川侍
丁得異常丁乎不殊常丁賦斂是老男老女死日短
促也國有養老公遽遣吏存問其疾苦亦和氣合應

之義也時雨可降之徵也愚以爲至仁之人常以正道應物天道遠去人不遠

畫馬贊

韓幹畫馬毫端有神驊騮老大腰裏清新魚目瘦腦龍文長身雪垂白肉風蹙蘭筋逸態蕭疎高驤縱恣四蹄雷電一日天地御者閑敏去何難易愚夫乘騎動必顛躓瞻彼駿骨實惟龍媒漢歌燕市已矣茫哉但見駑駘紛然往來良工惆悵落筆雄才

三萬里

穆天子傳飛兔腰裏日馳

雜述

杜子曰凡今之代用力爲賢乎進賢爲賢乎進賢賢乎則魯之張叔卿孔巢父二才士者聰明深察博辯闕大固必能伸於知己令聞不已任重致遠速於風

飈也是何面目薰黑常不得飯飽喫

飯一作飽

曾未如

富家奴茲敢望縞衣乘軒乎豈東之諸侯深拒於汝乎豈新令尹之人未汝之知也由天乎有命乎雖岑子薛子引知名之士月數十百填爾逆旅請誦詩浮名耳勉之哉勉之哉夫古之君子知天下之不可蓋也故下之知衆人之不可先也故後之嗟乎叔卿遣辭工於猛健放蕩似不能安排者以我爲聞人而已以我爲益友而已叔卿靜而思之嗟乎巢父執雌守常吾無所贈若矣泰山冥冥崑以高泗水潏潏瀾以清悠悠友生復何時會于王鎬之京載飲我濁酒載呼我爲兄

秋述

秋杜子臥病長安旅次多雨生魚青苔及榻常時車

馬之客舊雨來今雨不來昔襄陽龐德公至老不入
州府而揚子雲草元寂寞多爲後輩所褻近似之矣
嗚呼冠冕之窟名利卒卒雖朱門之塗泥土子不見
其泥矧抱疾窮巷之多泥乎子魏子獨蹢蹢然來汗
漫其僕夫夫又不假蓋不見我病色適與我神會我
棄物也四十無位子不以官遇我知我處順故也子
挺生者也無矜色無邪氣必見用則風后力牧是已
於文章則子游子夏是已無邪氣故也得正始故也
噫所不至於道者時或賦詩如曹劉談話及衛霍豈
少年壯志未息俊邁之機乎子魏子今年以進士調
選名隸東天官告余將行旣縫裳旣聚糧東人怵惕
筆札無敵謙謙君子若不得已知祿仕此始吾黨惡
乎無述而止

東西兩川說

聞西山漢兵食糧者四千人皆關輔山東勁卒多經
河隴幽朔教習慣於戰守人人可用兼羌堪戰子弟
向二萬人實足以備邊守險脫南蠻侵掠邛雅子弟
不能獨制但分漢勁卒助之不足撲滅是吐蕃馮陵
本自足支也權量西山邛雅兵馬卒叛援形勝明矣
頃三城失守罪在職司非兵之過也糧不足故也今
此輩見闕兵馬使八州素歸心於其世襲刺史獨漢
卒自屬裨將主帥一作之竊恐備吐蕃在羌漢兵小昵
而釁隙隨之矣况軍須不足姦吏減剝未已哉愚以
爲宜速擇偏裨主之主之勢明其號令一其刑賞申
其哀恤致其驩忻宜先自羌子弟始自漢兒易解人
意而優勸旬月大浹洽矣仍使兵羌各繫其部落刺

史得自教閱都受統於兵馬使更不得使八州都管
或在一羗王或都關一世襲刺史是羗之豪族發源
有遠近世封有豪家紛然聚藩落之議於中肆與奪
之權於外已然則備守之根危矣又何以藉其爲本
式遏雪嶺之西哉比羗族封王者初以拔城之功得
今城失矣襲王如故總統未已余諸董攘臂何王尹
之獄是矣由策嗣羗王關王氏舊親西董族最高怨
望之勢然矣誠於此時便宜聞上使各自統領不須
王區分易制然後都靜聽取別於兵馬使不益元戎
氣壯部落無語或縱一部落怨獲羣部落喜矣無爽
如此處分豈惟邛南不足憂八州之人願賈勇復取
三城不日矣幸急擇公所素諳明了將正色遣之獠
賊內編屬自久數擾背亦自久徒惱人耳憂慮蓋不

至大昨聞受鐵券爵祿隨之今聞已小動爲之奈何
若不先招諭也穀貴人愁春事又起緣邊耕種卽發
精卒討之甚易恐賊星散於窮谷深林節度兵馬但
驚動緣邊之人供給之外未見免劫掠而還賃其地
豪族兼有其地而轉富蜀之士肥無耕之地流冗之
輩近者交互其鄉村而已遠者漂寓諸州縣而已實
不離蜀也大抵抵與兼并豪家力田耳但鈞畝薄斂
則田不荒以此上供王命下安疲人可矣豪族轉安
是否非蜀仍禁豪族受賃罷人田管內最大誅求宜
約富家辦而貧家創痍已深矣今富兒非不緣子弟
職掌盡在節度衙府州縣官長手下哉村正里一作
見面不敢示文書取索非不知其家處獨知貧兒家
處兩川縣令刺史有權攝者須盡罷免苟得賢良不

在正授權在進退聞上而已

杜工部集卷第十九

杜工部集卷第二十目錄

策問文狀表碑誌十七首

乾元元年華州試進士策問五首

前殿中侍御史柳公紫微仙閣畫太一天尊圖

文

祭故相國清河房公文

爲遺補薦岑參狀

奉謝口勅放三司推問狀

爲華州郭使君進滅殘寇形勢圖狀

爲夔州柏都督謝上表

唐故德儀贈淑妃皇甫氏神道碑

唐故萬年縣京兆杜氏墓誌

唐故范陽太君盧氏墓誌

祭遠祖當陽君文

祭外祖祖母文

為閩州王使君進論巴蜀安危表

杜工部集卷第二十目錄

祭外祖國青阿公文

前漢中封喻史贈公祭贈山閣畫太一天真圖

漢元元平華州精壯士蒙問王首

黃問文州奏輯論十首

杜工部集卷第二十目錄

杜工部集卷第二十

策問文狀表碑誌十七首

乾元元年華州試進士策問五首

問山林藪澤之地各以肥磽多少爲差故供甲兵士
徒之役府庫賜與之用給郊廟宗社之祀奉養祿食
之出辨乎名物存乎有司是謂公賦知歸地著不撓
者已今聖朝紹宣王中興之洪業于上庶尹備山甫
補袞之能事于下而東寇猶小梗率土未甚闕總彼
賦稅之獲盡贍軍旅之用是官御之舊典闕矣人神
之攸序乖矣欲使軍旅足食則賦稅未能充備矣欲
將誅求不時則黎元轉罹于疾苦矣子等以待問之
實知新之明觀志氣之所存於應對乎何有佇渴救
敝之通術願聞強學之所措意道在此矣得游說乎

問國有輶車廬有飲食古之按風俗遣使臣在王官
之一守得馳傳而分命蓋地有要害郊有遠近供給
之比省費相懸今茲華惟襟帶關逼輦轂行人受辭
於朝夕使者相望於道路屬年歲無蓄積之虞職司
有愁痛之歎况軍書未絕王命急宣插羽先翥於騰
鷹敝帷不供於埋馬豈芻粟之勤獨爾實驂駢之價
闕如人主之軫念屢及於茲邦伯之分憂何嘗敢怠
乞恩難再近日已降水衡之錢積骨頗多無暇更入
燕王之市欲使輜軒有喜主客合宜閭閻罷杼軸之
嗟官吏得從容之計側佇新語當聞濟時
問通道陂澤隨山濬川經啓之理疏奠之術抑有可
觀其來尙矣初聖人盡力溝洫有國作爲隄防洎後
代控引淮海漕通涇渭因舟楫之利達倉庾之儲又

賴此而殷亦行之自久近者有司相土決彼支渠既
潰渭而亂河竟功多而事寢人實勞止岸乃善崩遂
使委輸之勤中道而棄今軍用蓋寡國儲未贍雖遠
方之粟大來而助挽之車不給是以國朝仗彼天使
徵茲水工議下淇園之竹更鑿商顏之井又恐煩費
居多績用莫立空荷成雲之插復擁填淤之泥若然
則舟車之用大小相妨矣軍國之食轉致或闕矣矧
夫人烟尙稀牛力不足者已子等飽隨時之要挺賓
王之資副乎求賢敷厥讜議

問足食足兵先哲雅誥蓋有兵無食是謂棄之致能
掉鞅靡旌斯可用矣况寇猶作梗兵不可去日聞將
軍之令親覩司馬之法關中之卒未息灞上之營何
遠近者鄭南訓練城下屯集瞻彼三千之徒有異什

一而稅竊見明發教以戰鬪亭午放其庸保課乃菽
麥以爲尋常夫悅以使人是能用古伊歲則云暮實
慮休止未卜及瓜之還交比翳桑之餓羣有司自救
不暇二三子謂之何哉

問昔唐堯之爲君也則天之敬授人時十六升自
唐侯者已昔帝舜之爲臣也舉禹之功克平水土三
十登爲天子者已本之以文思聰明加之以勞身焦
思旣睦九族協和萬邦黜去四凶舉十六相故五帝
之後傳載唐虞之美無得而稱焉易曰君子終日乾
乾詩曰文王小心翼翼竊觀古人之聖哲未有不以
君唱於上臣和於下致乎人和年豐成乎無爲而理
者也主上躬純孝之聖樹非常之功內則拳拳然事
親如有闕外則悻悻然求賢如不及伊百姓不知帝

力庶官但恭己而已寇孽未平咎徵之至數也倉廩未實物理之固然也今大軍虎步列國鶴立山東之諸將雲合淇上之捷書日至二三子議論引正詞氣高雅則遺侵盪滌之後聖朝砥礪之辰雖遭明主必致之於堯舜降及元輔必要之於稷禹驅蒼生於仁壽之域反瀆樸於羲皇之上自古哲主立極大臣爲體眇然坦途利往何順子有說否庶復見子之志豈徒瑣瑣射策趨競一第哉頃之間孝廉取備尋常之對多忽經濟之體考諸詞學自有文章在束以徵事曷成凡例焉今愚之粗徵貴切時務而已夫時患錢輕以至於量資幣權子母代復改鑄或行乎前榆莢後契刀當此之際百姓蒙利厚薄何人所制輕重又穀者所以阜俗康時聚人守位者也下至十室之邑

必有千鍾之藏苟凶穰以之貴賤失度雖封丞相而猶困侯大農而謂何是以繼絕表微無或區分踰越蒙實不敏仁遠乎哉

前殿中侍御史柳公紫微仙閣畫太一天尊圖
文

石鼈老放神乎始清之天遊目乎浩劫之家泠泠然馭乎風熙熙然登乎臺進而俯乎寒林退而極乎延閣見龍虎日月之君巨于疎梁塞于高壁骨者鬣者哲者黜者視遇之間若寇嚴敵者已伊四司五帝天之徒青節崇然綠輿駢然仙官洎鬼官無央數衆陽者近陰者遠俱浮空不定目所向如一蓋知北闕帝君之尊端拱侍衛之內於天上最貴矣已而左元之屬吏三洞弟子某進曰經始續事前柱下史河東柳

涉職是樹善損於而家憂於而國剝私室之匱渴蒸
人之安志所至也請梗槩帝君救護之慈朝拜之功
曰若人存思我主籙生之根死之門我則制伏妖之
興毒之騰凡今之人反側未濟柳氏柱史也立乎老
君之後獲隱嘿乎忍塗炭乎先生與道而遊與學而
遊可上以昭太一之威神于下下以昭柱史之告訴
于上玉京之用事也率土之發祥也惡乎寢而庸詎
仰而先生藐然若往頽然而止曰噫夫鳥亂於雲魚
亂於河獸亂於山是畢弋釣罟削格之智生是機變
邀退攫拾之智極故自黃帝已下干戈崢嶸流血不
乾骨蔽平原乖氣橫放溇風不返雖書載蠻夷率服
詩稱徐方大來許其慕中夏與夫容成中央氏尊盧
氏輩結繩而已百姓至死不相往來茲茂德困矣矧

賢主趣之而不及庸主聞之而不曉浩穰崩蹙數千
古哉至使世之仁者蒿目而憂世之患有是夫今聖
主誅干紀康大業物尙疵癘戰爭未息必揆當時之
變日慎一日衆之所惡與之惡衆之所善與之善勅
有司寬政去禁問疾薄斂修其土田險其走集以此
馭賊臣惡子自然百祥攻百異有漸天下洵洵何其
撓哉已登乎種種之民舍夫噶噶之意是巍巍乎北
闕帝君者肯不乘道腴卷黑簿詔北斗削死南斗注
生與夫圓首方足施及乎蠢蠕之蟲肖翹之物盡驅
之更始何病乎不得如昔在太宗之時哉石鼈老畢
辭三洞弟子某又某靜如得動如失久而却走不敢
貳問

祭故相國清河房公文

維唐廣德元年歲次癸卯九月辛丑朔二十二日壬
戌京兆杜甫敬以醴酒茶藕蓴鯽之奠奉祭故相國
清河房公之靈曰嗚呼純朴旣散聖人又歿苟非大
賢孰奉天秩唐始受命羣公間出君臣和同德教克
溢魏杜行之夫何畫一婁宋繼之不墜故實百餘年
間見有輔弼及公入相紀綱已失將帥干紀烟塵犯
闕王風寢頓神器圯裂關輔蕭條乘輿播越太子卽
位揖讓倉卒小臣用權尊貴倏忽公實匡救忘餐奮
發累抗直詞空聞泣血時遭侵沴國有征伐車駕還
京朝廷就列盜本乘弊誅終不滅高義沈埋赤心蕩
析貶官厭路讒口到骨致君之誠在困彌切天道闊
遠元精茫昧偶生賢達不必濟會明明我公可去時
代賈誼慟哭雖多顛沛仲尼旅人自有遺愛二聖崩

日長號荒外後事所委不在臥內因循寢疾憔悴無
悔死矢泉塗激揚風槩天柱旣折安仰翊戴地維則
絕安放夾載豈無羣彥我心忉忉不見君子逝水滔
滔泄涕寒谷吞聲賊壕有車爰送有紼爰操撫墳日
落脫劍秋高我公戒子無作爾勞斂以素帛付諸蓬
蒿身瘞萬里家無一毫數子哀過他人鬱陶水漿不
入日月其慆州府救喪一二而已自古所歎罕聞知
己曩者書札望公再起今來禮數爲態至此先帝松
柏故鄉枌梓靈之忠孝氣則依倚拾遺補闕視君所
履公初罷印人實切齒甫也備位此官蓋薄劣耳見
時危急敢愛生死君何不聞刑欲加矣伏奏無成終
身愧恥乾坤慘慘豺虎紛紛蒼生破碎諸將功勳城
邑自守鼙鼓相聞山東雖定灞上多軍憂恨展轉傷

痛氤氲元豈正色白亦不分培塿滿地崑崙無羣致
祭者酒陳情者文何當旅櫬得出江雲嗚呼哀哉尙
饗

爲遺補薦岑參狀

宣議郎試大理評事攝監察御史賜緋魚袋岑參右
臣等竊見岑參識度清遠議論雅正佳名早立時輩
所仰今諫諍之路大開獻替之官未備恭惟近侍實
藉茂材臣等謹詣閣門奉狀陳薦以聞伏聽進止

至德二載六月十三日左拾遺內供奉臣裴薦等狀

右拾遺內供奉臣孟昌浩

右拾遺內供奉臣魏齊聃

左拾遺內供奉臣杜甫

左補闕臣韋少遊

奉謝口勅放三司推問狀

右臣甫智識淺昧向所論事涉近激訐違忤聖旨既
下有司具已舉劾甘從自棄就戮爲幸今日已時中
書侍郎平章事張鎬奉宣口勅宜放推問知臣愚戇
舍臣萬死曲成恩造再賜骸骨臣甫誠頑誠蔽死罪
死罪臣以陷身賊庭憤惋成疾實從間道獲謁龍顏
猾逆未除愁痛難過猥廁袞職願少裨補竊見房瑄
以宰相子少自樹立晚爲醇儒有大臣體時論許瑄
必位至公輔康濟元元陛下果委以樞密衆望甚允
觀瑄之深念主憂義形於色况畫一保大素所蓄積
者已而瑄性失於簡酷嗜鼓琴董庭蘭今之琴工遊
瑄門下有日貧病之老依倚爲非瑄之愛惜人情一
至於玷汙臣不自度量歎其功名未垂而志氣挫衄

覬望陛下棄細錄大所以冒死稱述何思慮始竟闕
於再三陛下貸以仁慈憐其懇到不書狂狷之過復
解網羅之急是古之深容直臣勸勉來者之意天下
幸甚天下幸甚豈小臣獨蒙全軀就列待罪而已無
任先懼後喜之至謹詣閣門進狀奉謝以聞謹進

至德二載六月一日宣議郎行左拾遺臣杜甫狀
進

爲華州郭使君進滅殘寇形勢圖狀

右臣竊以逆賊束身檻中奔走無路尙假餘息蟻聚
苟活之日久陛下猶覬其匍匐相率降款盡至廣務
寬大之本用明惡殺之德故大軍雲合蔚然未進上
以稽王師有征無戰之義下以成古先聖哲之用心
茲事元遠非愚臣所測臣聞易載隨時不俟終日先

王之用刑也抑亦小者肆諸市朝大者陳諸原野今
殘孽雖窮蹙日甚自救不暇尙慮其逆帥望秋高馬
肥之便蓄突圍拒轍之謀大軍不可空勤轉輸之粟
諸將宜窮犄角之進頃者河北初收數州思明降表
繼至實爲平盧兵馬在賊左脅賊動靜乏利制不由
已則降附可知今大軍盡離河北逆黨意必寬縱若
萬一軼略河縣草竊秋成臣伏請平盧兵馬及許叔
冀等軍鄆州西北渡河先衝收魏或近軍志避實擊
虛之義也伏惟陛下圖之遣李銑殷仲卿孫青漢等
軍灑迤渡河佐之收其具博賊之精銳撮在相魏衛
之州賊用仰魏而給賊若抽其銳卒渡河救魏博臣
則請朔方伊西北庭等軍渡沁水收相衛賊若迴戈
距我兩軍臣又請郭口祁縣等軍驀嵐馳屯據林慮

縣界候其形勢漸進又遣李廣琛魯炘等軍進渡河收黎陽臨河等縣相與出入犄角逐便撲滅則慶緒之首可翹足待之而已是亦恭行天罰豈在王師必無戰哉愚臣聞見淺狹承乏待罪未精慎固之守輕議擒縱之術抑臣之夢寐貴有裨補謹進前件圖如狀伏聽進止乾元元年七月日某官臣狀進

爲夔府柏都督謝上表

臣某言伏奉月日制授臣某官祇拜休命內顧殞越策駑馬之力冒累踐之寵自數勳力萬無一稱再三怵惕流汗至踵謹以某月日到任上訖臣某誠戰誠懼頓首頓首死罪死罪伏以陛下君父任使之久掩臣子不逮之過就其小効復分深憂察臣劍南區區恐失臣節如彼加臣頻煩階級鎮守要衝如此勉勵

疲鈍伏揚陛下之聖德愛惜陛下之百姓先之以簡
易間之以樂業均之以賦斂終之以敦勸然後畢禁
將士之暴宏洽主客之宜示以刑典難犯之科寬以
困窮計無所出哀今之人庶古之道內救惇獨外攘
師寇上報君父曲盡庸拙之分下循臣子勤補失墜
之目灰粉骸骨以備守官伏惟恩慈胡忍容易愚臣
之願也明主之望也限以所領未遑謁對無任兢灼
之極謹遣某官奉表陳謝以聞臣誠喜誠懼死罪死
罪

唐故德儀贈淑妃皇甫氏神道碑

后妃之制古矣而軒轅氏帝嚳氏次妃之跡最有可
稱存乎舊史然則其義隱其文略周禮王者內職大
備而陰教宣詩人關雎風化之始樂得淑女蓋所以

教本古訓發皇婦道居具燕寢之儀動有環珮之節
進賢才以輔佐君子不淫色以取媚閨房雖彤管之
地功過必紀而金屋之寵流宕一揆稽女史之華實
嗣嬪則之清高亦時有其人偉夫精選淑妃諱字一作
某姓皇甫氏其先安定人也唯离封商於赫有光伊
元祖樹德於今不忘必宋之子莫之與比伊清風繼
代惠此餘美夫其系緒蕃衍紱冕所興列爲公侯古
有皇父充石則其宗可知也夫其體元消息經術之
美刊正帝圖中有元晏先生則其家可知矣嗟乎我
有奕葉承權輿矣我有徽猷展肅雍矣積羣玉之氣
自對白虹之天生五色之毛不離丹鳳之穴曾祖烜
皇朝宋州刺史祖粹皇朝越州刺史都督諸軍事父
日休皇朝左監門衛副率妃則副率府君之元女也

粵在襁褓體如冰雪氣象受於天和詩禮傳乎胎教
故列我開元神武之嬪御者豈易其容止法度哉今
上昔在春宮之日詔詰良家女擇視可否充備淑哲
太妃以內秉純一外資沈靜明珠在蚌水月鮮白美
玉處石崖岸津潤結襦而金印相輝同輦而翠旗交
影由是恩加婉順品列德儀雖掖庭三千爵秩十四
掩六宮以取俊超羣女以見賢豈渥澤之不流曾是
不敢以露才揚己卑以自牧而已夫如是言足以厚
人倫化風俗彌縫坤載之失夾輔元亨之求嗚呼彼
蒼也常與善何有初也不久好奈何况妃亦既遘疾
怙如慮往上以之服事最舊佳人難得送藥必經于
御手見寢始迴于天步月氏使者空說返魂之香漢
帝夫人終痛歸來之像以開元二十三年歲次乙亥

十月癸未朔薨于東京某宮院春秋四十有二嗚呼
哀哉望景向夕澄華微陰風驚碧樹霧重青岑天子
悼履綦之蕪絕惜脂粉之凝冷下麟鳳之銀床到梧
桐之金井嗚呼哀哉厥初權殯于崇政里之公宅後
詔以某月二十七日己酉卜葬於河南縣龍門之西
北原禮也制曰故德儀皇甫氏贊道中壺肅事後庭
孰云疾疢奄見凋落永言懿範用愴于懷宜登四妃
之列式旌六行之美可冊贈淑妃喪事所須並宜官
供河南尹李適之充使監護非夫清門華冑積行累
功序于王者之有始有卒介于嬪御之不僭不濫是
何存榮歿哀視有遇之多也有子曰鄂王諱瑤兼太
子太保使持節幽州大都督事有故在疚而卒豈無
樂國今也則亡匪降自天云何吁矣有女曰臨晉公

主出降代國長公主子滎陽潛曜官曰光祿卿爵曰
駙馬都尉昔王儉以公主恩尚帝女爲滎何晏兼關
內侯是亦晉朝歸美公主禮承於訓孝自於心霜露
之感形於顏色享祀之數缺於灑掃嘗戚然謂左右
曰自我之西歲陽載紀彼都之外道里遐絕聖慈有
蓬萊之深異縣有松檟之阻思欲輕舉安得黃鵠未
議巡豫徒瞻白雲望闕塞之風烟尋常涕泗懷伊川
之陵谷恐懼遷移於是下教邑司爰度碑版甫忝鄭
莊之賓客遊竇主之園林以白頭之嵇阮豈獨步於
崔蔡而野老何知斯文見託公子泛愛壯心未已不
論官闕游夏入文學之科兼敘哀傷顏謝有后妃之
誅銘曰

積氣之清積陰之靈漢曲迴月高堂麗星驚濤洶洶

過雨冥冥洗滌蒼翠誕生娉婷其一婉彼柔惠迥然開

爽綢繆之故昔在明兩恩渥未渝康哉大往展如之

媛孰與爭長其二珩珮是加輦禴克備先德後色累功

居位壺儀孔修宮教咸遂王于獎飾禮亦尊異其三小

苑春深離宮夜逼花間度月同輦未歸池畔臨風焚

香不息嗚呼變化惠好終極其四馮相視祲太史書氛

藏舟晦色逝水寒文翠幄成彩金鑪罷燠燕趙一馬

瀟湘片雲其五恍惚餘跡蒼茫具美王子國除匪他之

取公主愁思永懷于彼日居月諸邱隴荆杞其六巖巖

禹鑿瀾瀾伊川列樹拱矣豐碑缺然爰謀述作歛就

雕鐫金石照地蛟龍下天其七少室東立繚垣西走佛

寺在前宮橋在後維山有麓與碑不朽維水有源與

詞永久其八

唐故萬年縣君京兆杜氏墓誌

甫以世之錄行跡示將來者多矣大抵家人賄賂詞
客阿諛真僞百端波瀾一揆夫載筆光芒於金石作
程通達於神明立德不孤揚名歸實可以發皇內則
標格女史竊見於萬年縣君得之矣其先系統於伊
祁分姓於唐杜吾祖也我知之遠自周室迄於聖代
傳之以仁義禮智信列之以公侯伯子男春秋傳云
穆叔謂之世祿其在茲乎曾祖某隋河內郡司功獲
嘉縣令王父某皇監察御史洛州鞏縣令前朝咸以
士林取貴宰邑成名考某修文館學士尚書膳部員
外郎天下之人謂之才子兄升國史有傳縉紳之士
誅爲孝童故美玉多出於崑山明珠必傳於江海蓋
縣君受中和之氣成肅雍之德其來尚矣作配君子

實惟好仇河東裴君諱榮期見任濟王府錄事參軍
入在清通同行領袖素髮相敬朱紱有光縣君既早
習于家風以陰教爲己任執婦道而純一與禮法而
始終可得聞也昔舅歿姑老承順顏色侍歷年之寢
疾力不暇於須臾苟便於人皆在於手淚積而形骸
奪氣憂深而巾櫛生塵尊卑之道然固出自於天性
孝養哀送名流稱仰允所謂能循法度則可以承先
祖供給祭祀矣維其矜莊門戶節制差服功成則運
有若四時物或猶乖匪踰終日黼畫組就之事割烹
煎和之宜規矩數及於親姻脫落頗盈於歲序若其
先人後己上下敦睦懸罄知歸揖讓惟久在嫂叔則
有謝氏光小郎之才於娣姒則有鍾琰洽介婦之德
周給不礙於親踈泛愛無擇於良賤至於星霜伏臘

軒騎歸寧慈母每謂於飛來幼童亦生乎感悅加以
詩書潤業導誘爲心遏悔吝於未萌驗是非於往事
內則致諸子於無過之地外則使他人見賢而思齊
爰自十載已還默契一乘之理絕葷血於禪味混出
處於度門喻筏之文字不遺開卷而音義皆達母儀
用事家相遵行矣至於膳食滑甘之美鞞結縫線之
難展轉忽微欲參謀而縣解指麾補合猶取則於垂
成其積行累功不爲薰修所住著有如此者靈山鎮
地長吐烟雲德水連天自浮星象則其看心定惠豈
近於揚摧者哉越天寶元年某月八日終堂于東京
仁風里春秋若干示諸生滅相越六月二十九日遷
殯于河南縣平樂鄉之原禮也嗚呼哀哉琴瑟罷聲
蘋蘩晦色骨肉號兮天地感中外痛兮鬼神惻有長

子曰朝列次朝英北海郡壽光尉次朝牧女長適獨
孤氏次閻氏皆稟自胎教成於妙年厥初寢疾也唯
長子長女在側英牧或以遊以宦莫獲同曾氏之元
申號而不哭傷斷鄰里悠哉少女未始聞哀又足酸
鼻嗚呼縣君有語曰可以褐衣斂吾起塔而葬裴公
自以從大夫之後成縣君之榮愛禮實深遺意蓋闕
但褐衣在斂而幽隧爰封其所廡飾咸遵儉素怨茲
邑號未降天書各有司存成之不日嗚呼哀哉有兄
子曰甫制服於斯紀德於斯刻石於斯或曰豈孝童
之猶子歟奚孝義之勤若此甫泣而對曰非敢當是
也亦爲報也甫昔臥病於我諸姑姑之子又病間女
巫至曰處楹之東南隅者吉姑遂易子之地以安我
我是用存而姑之子卒後乃知之於走使甫嘗有說

於人客將出涕感者久之相與定謚曰義君子以爲魯義姑者遇暴客於郊抱其所攜棄其所抱以割私愛縣君有焉是以舉茲一隅昭彼百行銘而不韻蓋情至無文其詞曰

嗚呼有唐義姑京兆杜氏之墓

唐故范陽太君盧氏墓誌

五代祖柔隋吏部尚書容城侯大父元懿是渭南尉父元哲是廬州慎縣丞維天寶三載五月五日故修文館學士著作郎京兆杜府君諱某之繼室范陽縣太君盧氏卒於陳留郡之私第春秋六十有九嗚呼以其載八月旬有一日發引歸葬於河南之偃師以是月三十日庚申將入著作之大塋在縣首陽之東原我太君用甲之穴禮也墳南去大道百二十步奇

三尺北去首陽山二里凡塗車芻靈設熬置銘之名
物加庶人一等蓋遵儉素之遺意塋內西北去府君
墓二十四步則壬甲可知矣遣奠之祭畢一回家相
進曰斯至止將欲啓府君之墓門安靈櫬於其右豈
廡飾未具時不練歟前夫人薛氏之合葬也初太君
令之諸子受之流俗難之太君易之今茲順壬取甲
又遺意焉嗚呼孝哉孤子登號如嬰兒視無人色且
左右僕妾洎廝役之賤皆蓬首灰心嗚呼流涕寧或
一哀所感片善不忘而已哉實惟太君積德以常臨
下以恕如地之厚縱天之和運陰教之名數秉女儀
之漂格嗚呼得非太公之後必齊之姜乎薛氏所生
子適曰某故朝議大夫兗州司馬次曰升幼卒報復
父讎國史有傳次曰專厯開封尉先是不祿息女長

適鉅鹿魏上瑜蜀縣丞次適河東裴榮期濟王府錄
事次適范陽盧正均平陽郡司倉參軍嗚呼三家之
女又皆前卒而某等夙遭內艱有長自太君之手者
至於婚姻之禮則盡是太君主之慈恩穆如人或不
知者咸以爲盧氏之腹生也然則某等亦不無平津
孝謹之名於當世矣登卽太君所生前任武康尉二
女曰適京兆王佑任硤石尉曰適會稽賀撫卒常熟
主簿其往也旣哭成位有若冢婦同郡盧氏介婦榮
陽鄭氏鉅鹿魏氏京兆王氏女通諸孫子三十人內
宗外宗寢以疎闊者或元纁玉帛自他至若以爲杜
氏之葬近於體而可觀而家人亦不敢以時繼年式
志之金石銘曰

太君之子朝儀所尊貴因長子澤就私門毫邑之都

終天之地享年不永歿而猶視

祭遠祖當陽君文

維開元二十九年歲次辛巳月日十三葉孫甫謹以
寒食之奠敢昭告于先祖晉駙馬都尉鎮南大將軍
當陽成侯之靈初陶唐出自伊祁聖人之後世食舊
德降及武庫應乎虬精恭聞淵深罕得窺測勇功是
立智名克彰繕甲江陵浸清東吳建侯于荊邦于南
土河水活活造舟爲梁洪濤莽汜未始騰毒春秋主
解橐隸躬親嗚呼筆跡流宕何人蒼蒼孤墳獨出高
頂靜思骨肉悲憤心曾峻極于天神有所降不毛之
地儉乃孔昭取象邢山全模祭仲多藏之誠焯序前
文小子築室首陽之下不敢忘本不敢違仁庶刻豐
石樹此大道論次昭穆載揚顯號于以采繫于彼中

園誰其尸之有齊列孫嗚呼敢告茲辰以永薄祭尙饗

祭外祖祖母文

維年月日外孫滎陽鄭宏之京兆杜甫謹以寒食庶羞之奠敢昭告于外王父母之靈嗚呼外氏當房祭祀無主伯道何罪元陽誰撫緬惟夙昔追思艱窶當太后秉柄內宗如縷紀國則夫人之門舒國則府君之外父聿以生居貴戚釁結狂豎雌伏單棲雄鳴折羽憂心惓惓獨行踽踽悲夫景分飛忽間于鳳皇咄彼讒人有詞異於鸚鵡初我父王之遘禍我母妃之下室深徃殊塗酷吏同律夫人於是布裙屣履提餉潛出昊天不傭退藏于密久成凋瘵溘至終畢蓋乃事存于義陽之誅名播于燕公之筆嗚呼哀哉宏之

等從母昆弟兩家因依弱歲俱若慈顏永違豈無世
親不如所愛豈無舅氏不知所歸誓以徧往測戀光
輝漸漬相勛居諸造微幸遇聖主願發清機以顯內
外何當奮飛洛城之北邙山之曲列樹風烟寒泉珠
玉千秋古道王孫去兮不歸三月晴天春草萋兮增
綠頃物將牽累事未遂欲使淚流頓盡血下相續者
矣捧奠遲迴炯心依屬庶多載之灑掃循茲辰之軌

一作躅

爲閩州王使君進論巴蜀安危表

臣某言伏自陛下平山東收燕薊洎海隅萬里百姓
感動喜王業再康瘡痍蘇息陛下明聖社稷之靈以
至於此然河南河北貢賦未入江淮轉輸異於曩時
唯獨劍南自用兵已來稅斂則殷部領不絕瓊林諸

庫仰給最多是蜀之土地膏腴物產繁富足以供王命也近者賊臣惡子頻有亂常巴蜀之人橫被煩費猶相勸勉充備百役不敢怨嗟吐蕃今下松維等州成都已不安矣楊琳師再脅普合顆顆兩川不得相救百姓騷動未知所裁况臣本州山南所管初置節度庶事草創豈暇力及東西兩川矣伏願陛下聽政之餘料巴蜀之理亂審救援之得失定兩川之異同問分管之可否度長計大速以親賢出鎮哀罷人以安反仄犬戎侵軼羣盜窺伺庶可遏矣而三蜀天府也徵取萬計陛下忍坐見其狼狽哉不卽爲之臣竊恐蠻夷得恣屠割耳實爲陛下有所痛惜必以親王委之節鉞此古之維城盤石之義明矣陛下何疑哉在近擇親賢加以醇厚明哲之老爲之師傅則萬無

覆敗之跡又何疑焉其次付重臣舊德智略經久舉
事允愜不隕穫于蒼黃之際臨危制變之明者觀其
樹勲庸於當時扶泥塗於已墜整頓理體竭露臣節
必見方面小康也今梁州旣置節度與成都足以久
遠相應矣東川更分管數州於內幕府取給破弊滋
甚若兵馬悉付西川梁州益坦爲聲援是重斂之下
免至多門西南之人有活望矣必以戰伐未息勢資
多軍應須遣朝廷任使舊人授之使節留後之寄綿
歷歲時非所以塞衆望也臣於所守封界連接梓州
正可爲成都東鄙其中別作法度亦不足成要害哉
徒擾人矣伏惟明主裁之又天下徵收赦文減省軍
用外諸色雜賦名目伏願損之又損之劍南諸州亦
困而復振矣將相之任內外交遷西川分壺以仗賢

俊愚特望以親王總戎者意在根固流長國家萬代之利也敢輕易而言次請慎擇重臣亦願任使舊人鎮撫不缺借如犬戎俶擾臣素知之臣之兄承訓自沒蕃已來長望生還僞親信于贊普探其深意意者報復摩彌青海之役決矣同謀誓衆於前後沒落之徒曲成翻動陰合應接積有歲時每漢使回蕃使至帛書隱語累嘗懇論臣皆封進上聞屢達臣兄承訓憂國家緣邊之急願亦勤矣况臣本隨兄在蜀向二十年兄既辱身蠻夷相見無日臣比未忍離蜀者望足消息時通所以戮力邊隅累踐班秩補拙之分淺待罪之日深蜀之安危敢竭聞見臣子之義貴有所盡於君親愚臣迂闊之說萬一少裨聖慮遠人之福也愚臣之幸也昨竊聞諸道路出吐蕃已來草竊岐

隴逼近咸陽似是之間憂憤隕迫益增尸祿寄重之
懼寤寐報効之懇謹冒死具巴蜀成敗形勢奉表以
聞

杜工部集卷第二十

之利也

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文

之利也誠輕身而言文